

【经文信息】大正藏第 21 册 No. 1391

佛说檀特罗麻油述经 1 卷

No. 1391

佛说檀特罗麻油述经

东晋竺昙无兰译

佛在摩竭国因沙夺山中。时佛子罗云随佛在山中。罗云夜卧为鬼神所烧惊起。明日至佛所为佛作礼。却在四面树下坐。罗云以手扶颊。低头不乐默然不语。佛即问罗云。何以低头如畏怖状。罗云言我昨日夜卧。为鬼神所烧。佛语罗云。天下或生人烧人。或山神烧人。或道沟边鬼神烧人。或善死鬼神烧人。来欲试人经道恐人。欲知其心坚濡。佛语罗云。汝取佛辟鬼神呪。后觉有鬼神来烧汝者。持是鬼神名字。以慈心说之。

阿波竭 证证竭 无多萨 憍迟比迟沾波沾波迦罗准 维陵无 因轮无 指
轮无 汉沙无 因登罗 宋林罗 和林罗 波耶越罗 檀特罗

佛言是檀特罗经。佛故为诸弟子结恩经。佛告诸弟子。有急者当读之。鬼神僮来烧人者。当持慈心哀心。净还自视五藏思念五藏。佛说是经时。日月尚有堕地。佛语终不有异。今佛说是檀特罗经。以说生人欲来烧人者不得烧人。山神亦不得烧人。道沟边鬼神亦不得烧人。腥死鬼神亦不得烧人。善死鬼神亦不得烧人。闻是语火为不然。食饭得毒毒为不行。欲杀人刀为不向。溺深水中为不没难。群有四子人行空闲处。若行县邑中大国中。若对会若大坐中。耆老中伴侣中。步行中坐卧中。值有盂道家者。向读是经盂道为不行。佛即为罗云说。使罗云为诸比丘比丘尼优婆塞优婆夷及诸白衣。皆令讽诵之。

【经文信息】大正藏第 21 册 No. 1391 佛说檀特罗麻油述经

【版本记录】CBETA 电子佛典 Rev. 1.9 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
